

ЖАҢА ЖОБАЛАР САПАЛЫ БОЛУЫ КЕРЕК



Мемлекет басшысы кеше Астана қаласындағы бірқатар нысандарды аралап көрді. Әуелі ол SANA оқушылар сарайына, одан соң «Тұран» газ жылу станциясына және Kazakhstan Paramount Engineering зауытына барды.

Бес қабатты заманауи ғимаратта орналасқан SANA оқушылар сарайында 5-17 жас аралығындағы жеткіншіктерге арналған 60-тан астам үйірме мен спорт секциялары жұмыс істейді. Олар техникалық шығармашылық, сәндік-колданбалы өнер, әлеуметтік ғылымдар, музыка және хореография, спорт секілді бірнеше бағытқа бөлінген. Орталық бір мезгілде 700 баланы қабылдай алады. Аумағы 7 500 шаршы метр ғимаратта соңғы үлгідегі технологиялармен жабдықталған оқу кабинеттері, жүзу бассейні, акт залы, подкаст және фото студиялары бар. Мемлекет басшысы Lego құрастыру, роботтық техника, 3D-модельдеу және қыш өнері, ұрмалы аспаптар, домбыра үйірмесі кабинеттері мен жүзу бассейнін аралап көрді. Сондай-ақ Президент орталықтың оқытушыларымен, балалармен және ата-аналармен әңгімелесті.

Бизнес өкілдерімен кездесу өткіздім. Бұл балалар үшін, өскелең ұрпақ үшін қажет. Сондықтан біз бұл мәселеге баса мән береміз, — деді Қасым-Жомарт Тоқаев. SANA жана ұрпақ орталығын Damu Development Group консорциумы бизнесінің әлеуметтік жауапкершілігі аясында салған. Компания құрылтайшысы Абзал Сағымбаев алдағы уақытта бірнеше дамыту орталықтарын, әлеуметтік, денсаулық сақтау нысандарын салу жоспарланып отырғанын жеткізді. Астана қаласының әкімі Жәніс Қасымбектің айтуынша, 2029 жылға дейін елордада осындай 15 оқушылар сарайы бой көтереді. Оның ішінде 5 орталықтың құрылысы жуық арада басталады.

Одан соң Мемлекет басшысы «Тұран» газ жылу станциясына барды. Президент «Тұран» және «Оңтүстік-Шығыс» газ жылу станцияларының, сорғы-сүзгі станциясының және үшінші ЖЭО-ның құрылыс жұмыстарының барысымен танысты.

Астана қаласының әкімі Жәніс Қасымбек Мемлекет басшысына «Оңтүстік-Шығыс» газ жылу станциясының және жалпы қуаты сағатына 700 гигакалорий болатын «Тұран» газ жылу станциясының бірінші кезеңінің құрылыстары аяқталғаны туралы мәлімет берді. Оның айтуынша, «Оңтүстік-Шығыс» станциясы Мыңжылдық аллеясы, «Нұрлы жол» вокзалы, «Бағыстан» тұрғын алабы сияқты құрылысы қарқынды түрде жүріп жатқан аудандарды, ал «Тұран» станциясы қаланың сол жағалауында жаңадан салынып жатқан аумақты тұрақты жылумен қамтамасыз етеді.

Мемлекет басшысына аталған газ жылу станциялары биылғы жылыту маусымының басынан бастап іске қосылатыны жөнінде баяндалды. Жыл аяғына дейін үшінші ЖЭО-ның құрылысы аяқталады. Үш жана нысан қаланы қосымша жылумен қамтамасыз етеді. Оның қуаты — сағатына 1140 гигакалорий. «Тұран» газ жылу станциясының екінші кезеңінің салынуы және «Тельман» жана газ жылу станциясы қуаты сағатына 850 гигакалорий болатын қосымша жылу береді. Құрылыс компаниясының өкілдері Қазақстанда газ жылу станцияларының өн-

дірістегі отандық үлесін арттыру үшін газ жабдықтарын өндіруші кәсіпорындармен арада уағдаластықтар бар екенін жеткізді. Президент газ жылу станцияларын кезең-кезеңмен пайдалануға беруді тапсырды.

— Ең алдымен, жобалардың сапасы жоғары болуға тиіс. Біз оны қадағалаймыз. Мұндай жобалар қалаға өте қажет. Мен бұл жерге осы мақсатпен келдім. Әр қалада үш негізгі мәселе бар. Олар — жылу, жарық және су. Тұрғындар бұл қажеттіліктермен міндетті түрде қамтамасыз етілуі керек. Оның үстіне, сөз елорда туралы болып отыр. Ешқандай кідіріс болмауға тиіс. Бұл, түптеп келгенде, біздің мемлекетіміздің беделі мен имиджіне қатысты мәселе. Сондықтан аталған мәселені бәріміз жұмылып, міндетті түрде толық шешуіміз қажет, — деді Мемлекет басшысы.

Жәніс Қасымбек Президентке Астана су қоймасынан тартылатын су құбырының және сорғы-сүзгі станциясының іске қосылуы жөнінде айтты. Оның мәліметі бойынша, биылғы қарашада Нұра жерасты су көзінен қуаты 48 мың текше метр болатын су құбырын тарту, сондай-ақ «Тельман» сорғы станциясының қуатын күніне 160 мың текше метрге дейін

жеткізу жөніндегі жобалау жұмыстары аяқталады. Қасым-Жомарт Тоқаев елорда халқының саны жылдан-жылға көбейіп келе жатқанына байланысты қосымша су көздерімен қамтамасыз ету жолдарын ізлеу қажеттігіне назар аударды. Сондай-ақ қаладағы жана жылу нысандарының құрылысын уақытылы аяқтауды тапсырды.

Президент елорданың индустриалды нысандарын аралау барысында бронды дөңгелекті техника өндіруге және жаңғыртуға маманданған Kazakhstan Paramount Engineering зауытына да барды. Бұл компания 2013 жылы құрылған. Қазақстан аумағында өз өндірісін ашу және бәсекеге қабілетті заманауи бронды техникаға сервистік қызмет көрсету, сондай-ақ түрлі міндеттерді орындауға арналған бронды дөңгелекті машина өндірісін өркендету аталған компанияның артықшылығы саналады. Мемлекет басшысы осы саланы ілгерілетудің келешегі зор екенін ерекше атап өтіп, компанияны қорғаныс өнеркәсібіне маманданған отандық кәсіпорындарды дамытуға жан-жақты атсалысуға шақырды.

Нұрлан ҚОСАЙ

КИБЕРҚАУІПСІЗДІКТІ САҚТАУ – МАҢЫЗДЫ БАҒЫТ



3 БЕТ

ТӨРЕШІЛЕРДІҢ ШЕШІМІМЕН ЖАНКҮЙЕРЛЕР КЕЛІСПЕЙДІ



8 БЕТ

«ЖАҢА БИЗНЕС» ҚҰРЫЛЫСТЫ ЖАРҒА ЖЫҒУЫ МҮМКІН

Қазақстанда аса табысты жаңа бизнес «белең алды». Оған сәйкес, жауапты органдарда тамыр-таныстығы бар адамдар лицензиялары мен аккредиттеу куәлігіне ие құрылыс және жобалау компанияларын тіркеп, артынша сатып жібереді. Бұл «кесірлі» кәсіптің кең ауқым алғаны сонша, ол көлеңкеде, құпия түрде емес, ашықтан ашық жүргізіледі.

4»



Фараби ЕРМЕКОВ:

АУЫЛ ШАРУАШЫЛЫҒЫНА ҚАТЫСТЫ АҚПАРАТТЫҢ ЖАРТЫСЫ ЖАЛҒАН



2025 жылға қарай жаһандық деректер базасындағы ақпараттық деректер 175 зеттабайтқа жетеді екен. «Бұл дегеніміз — әлемдегі электронды ақпарат сақтаушы алпауыттардың жұмысын біршама қиындатады деген сөз», — дейді америкалық цифрлы трансформация саласы бойынша танымал сарапшы Douglas Karr.

6»

МҰҒАЛІМ – БҰЛ АДАМНЫҢ АРДАҚТЫ АТЫ

Бүгін — Устаздардың кәсіби мерекесі. Мемлекеттік мерекелер тізіміне сәйкес, елімізде аталмыш мейрам қазанның алғашқы жексенбісінде тойланып келген еді. Биылдан бастап Үкімет қаулысымен ұлағатты қауымның мерекесі 5 қазанда әлемнің жүзден аса елі атап өтетін Дүниежүзілік мұғалімдер күніне сәйкестендірілді.

5»



